

02.09.2021.



U Ministarstvu za privredu Bosansko-podrinjskog kantona danas je upriličeno potpisivanje ugovora sa udruženjima koji su aplicirali na javni poziv „Program podrške neprofitnim organizacijama za 2021.godinu“ u budžetu Ministarstva za privredu, na ekonomskom kodu „Tekući transferi neprofitnim organizacijama“.

Prema riječima ministra Mensuda Arnauta, na raspisani javni poziv aplicirala su četiri udruženja: Udruženje poslodavaca, Obrtnička komora, Opće udruženje „Stari zanati „ obrtnika grada Goražde i Privredna komora BPK-a Goražde koji su dobili namjenska sredstva u iznosu od po 7.500 KM.

Za ovu je namjenu, kako ističe ministar Arnaut, ove godine u budžetu izdvojeno 30. 000 KM, što je veći iznos u odnosu na 2019. i 2020. godinu kada bilo izdvojeno 15.000 i 20.000 KM.



„ Ovo je podrška Vlade BPK-a pomenutim udruženjima za njihovu opstojnost, kroz sufinansiranje, finansiranje ili isplatu nekih obaveza i doprinosa itd. Vjerujem da će se ova dobra saradnja koju smo imali s njima nastaviti i ubuduće. Njihova obaveza je da nam dostave i druge izvore finansiranja, tako da nisu samo oslonjeni na budžet BPK-a Goražde nego da apliciraju i na druge projekte za koje smo vidjeli da su korisnici“, naglasio je ministar privrede BPK Goražde Mensud Arnaut.

Riječi zahvalnosti Vladi i Ministarstvu privrede u ime korisnika ovih sredstava uputila je predsjednica Udruženja poslodavaca BPK Goražde Šejla Bojadžija. Ona je naglasila da iznos

sredstava od 7.500 KM koje će Udruženje poslodavaca ove godine dobiti nije mali u odnosu na 4.000 KM u prethodnim godinama, posebno kad se ima u vidu doba pandemije i poteškoće s kojima se suočavaju goraždanski privrednici te da će ovo udruženje kroz realizaciju raznih projekata nastojati ta sredstva i opravdati.



„Imamo izuzetan partnerski odnos sa Ministarstvom za privredu i nastojat ćemo na tom polju da proširimo malo saradnju i da problematika koja bude aktuelna, da se o njoj govori. Mi ćemo iz privrede nastojati da pratimo sve to i da zajednički prebrodimo sve nevolje i probematiku kako u našem Kantonu, tako i u državi i svijetu. Najavljuje se novi val koronavirusa i uputili smo poziv kompanijama da bi bilo dobro da se svi uposlenici vakcinišu na vrijeme, te da imamo ažurirane podatke o vakcinaciji. Ne smijemo doći do zastoja u privredi, ne smijemo stati s radom“- poručila je predsjednica Udruženja poslodavaca BPK Goražde Šejla Bojadžija nakon današnjeg potpisivanja ugovora u Ministarstvu privrede BPK Goražde.



